

RHYS CAIN (bu farw 1614), arwyddfardd

Enw: Rhys Cain
Dyddiad marw: 1614
Priod: Catrin ferch Dafydd
Priod: Gwen wraig Rhys Cain
Plentyn: Elisabeth
Plentyn: Dorithie
Plentyn: Ann
Plentyn: Siôn Cain
Plentyn: Roger
Rhiant: Rheinallt ap John Wynn
Rhyw: Gwryw
Galwedigaeth: arwyddfardd
Maes gweithgaredd: Hanes a Diwylliant; Barddoniaeth; Teuluoedd Brenhinol a Bonheddig
Awdur: Evan David Jones

Yn ôl yr hen eiriaduron bywgraffyddol, brodor ydoedd o Drawsfnnydd, ond y mae'n debycach iddo gymryd ei enw barddol oddi wrth afon Cain ym Mechain Iscoed. Olrheinir ei ach o [Edwin](#), frenin Tegeingl. Ei dad oedd Rheinallt ap John Wynn, ac yr oedd ei nain, fam ei dad, yn ferch Thomas Ireland, Croesoswallt. Yng Nghroesoswallt hefyd y treuliodd yntau ran helaethaf ei oes. Yno y bedyddiwyd ei blant ieuengaf, Ann yn 1579, Dorithie yn 1587, Roger yn 1589, ac Elisabeth yn 1592, ac yno y claddwyd ei wraig, Gwen, 19 Ebrill 1603. Priododd drachefn â Chatrin ferch Dafydd, yr hon a'i goroesodd. [William Ll n](#) oedd ei athro barddol, a gadawodd ei lyfrau a'i roliau iddo wrth yr enw ' Rice ap Rinald alias Kain,' yn ei ewyllys, 1580, a chanodd yntau farwnad iddo ar ddull ymddiddan, megis y gwnaethai [William Ll n](#) ar farwolaeth [Gruffudd Hiraethog](#), ei athro yntau. Dywedir ei fod yn beintiwr ac iddo beintio darlun o'r Dioddefaint gan gythruddo rhai o'i gyfoeswyr. Fel arwyddfardd, a wnaï gartau achau i'w gwsmeriaid, yr oedd ganddo grap ar beintio, er mai digon cwrs oedd ei waith. Collwyd ei lyfr clera mawr, yn yr hwn y cadwai gopiâu o'i gywyddau achyddol, yn nhân Wynnstay, 1859, ond erys corff sylweddol o'i waith rhwng y blynyddoedd 1574 a 1590 yn ei law ei hun (Pen. MSS. 68 a 69) a chasgliad o farwnadau (N.L.W. MS. 433). Edrychai [Robert Vaughan](#), Hengwrt, arno fel ei athro mewn achyddiaeth. Ceir 10 llythyr (1592-1612) wedi eu hysgrifennu ato yn Pen. MS. 327, ac yn llawysgrif 178, yn yr un casgliad, y mae cyfrif diddorol o'i enillion (£23 2s. 6ch.) ar daith glera. Claddwyd ef yng Nghroesoswallt 10 Mai 1614, a dilynwyd ef yn ei alwedigaeth gan ei fab [Siôn Cain](#).

Awdur

Evan David Jones, (1903 - 1987)

Ffynonellau

Oxford Dictionary of National Biography

Robert Williams, *Enwogion Cymru. A Biographical Dictionary of Eminent Welshmen (1852)*

R. Williams, *Montgomeryshire Worthies (1894)*

Reports of the Historical Manuscripts Commission, R.W.M

Shropshire Parish Register Society. Publications

H. B. Thomas, *A History of the Diocese of St. Asaph (1874)*, iv

N.L.W. *Llawysgrifau Peniarth yn Llyfrgell Genedlaethol Cymru, Aberystwyth* 68-9, 117, 139, 141, 149, 161, 178, 269, 288, 327
NLW MS 433, cartau achau Peniarth, Plas Nantglyn, ac Aberglaslyn

Darllen Pellach

Erthygl Wicipedia: [Rhys Cain](#)

Dolenni Ychwanegol

Wikidata: [Q7321765](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

